

鄧尉聖恩寺志

鄧尉山聖恩禪寺志序

於華藏世界中紀九州四海賦  
三都兩京過量人猶軒渠以爲  
是算稊米太倉數一毛全馬也  
矧夫郡一邑邑一山山一寺如

聖恩之在鄧尉顧欲取其人物  
語言盛衰廣狹更僕而指數之  
以成一袞壽之棗梨是不可以  
已乎有說焉是寺故善知識龍  
象蹴蹋之區也腳尖所踢拄杖

所挑時有無量諸佛菩薩於一  
毫端放光明動地唐宋以前雖  
未大著數百年來塵垢粃糠豈  
止一二人堯舜哉以言乎至小  
莫頂踵若進而之芥子之藕絲

眇乎眇矣然而納萬卷書於頂  
踵納須彌於芥子納八萬四千  
修羅於藕絲孔中一一坦舒無  
壞無雜則其間高廣奧折雖使  
離婁運睛普眼播舌隸算頡書

如此百千萬營營窮劫亦不能  
盡志之於山於寺祇不足是患  
患有餘乎哉安期周君以剖師  
命任此役蹉跎未及就余故受  
三峰老人付囑願觀厥成敦趣

登易學  
之乃竟業會

魚月  
國難相尋彼此

無暇晷略加裁定卽授梓人如

譜奕然此王積薪所受嘗執耳

後有作者於是十九道中一道

或一道中一着監百千妙義使

觀者讀者窮未來莫能彈究庶  
幾漚漚乎大觀矣

大明崇禎甲申歲仲秋日楚人熊  
開元敬識



鄧尉聖恩寺志敘

聖恩堂頭剖石和尚初繼師席方  
振宗風宜其不以文字爲意顧卽  
購得山志舊本并條示法源及中  
興事實持以授余俾作寺志余承  
命以來略已草創顧以懶性而兼

雜學遂至緩於討論修飾之事因循直逾六載和尚旣屢書相促嘉魚熊先生復寄遠信欲急觀厥成乃復尋繹舊聞搜採別書稿凡再易釐爲十八卷稍具權輿以待能文者之潤色蓋茲山於花事爲香

國季廸輩所不能盡詠於佛教爲  
禪窟子威輩所樂與首載以視虎  
丘之有隆祖洞庭之有顯懷父子  
皆用名山之傑出者以高豎法幢  
又不與他叢林比惟以晦於前代  
顯於

國初故不獲入唐宋人紀述要以鼻  
觀心宗咸據絕勝則亦何嫌於後  
出若夫爲袁爲玄之有別爲尉爲  
蔚之各殊與夫玄墓鄧尉之爲離  
爲合開闢來已具與曠之觀傳聞  
間奚爭同異之數撫卷而如按圖

興寓目者之能會意耳况禪學中  
興祖庭再闢曹溪南嶽近在湖山  
或亦能令觀者一新眼界且至并  
忘作者之孤陋寡聞矣舊志重在  
山故止標名勝今志重在寺故悉  
備故實斯則和尚見委之微指余

所緣以屬筆者也

崇禎壬午仲冬旣望周山樵者周

永年書



鄧尉山舊志序

陸 榮

鄧尉吳之名山也前此未有志沈君潤卿始爲之  
讀者謂其詳贍得體非苟作也余少時嘗一游茲  
山今二十年矣間者再至雖巖壑之勝不殊而梵  
宇荒落頓異疇昔其間幽棲邃構往往爲勢家所  
據而長松古梅剪伐殆盡問之山僧云苦更賦繁  
重鬻以償逋負矣余聞而憮然比得君志讀之則  
往時秀傑深迥之觀猶歷歷在目爲太息不能已

抑盛衰相尋固物理之嘗未足深論余獨慨夫橫  
政亟行而人力之日單竭也雖浮屠氏自謂修出  
世法者猶不能一日安其居以保其所有矧夫齊  
民者耶君子卽是編以考其廢興之故可以占時  
政焉不徒觀游之細而已而君所謂區區纂輯意  
亦有在於斯乎故書其後以俟夫觀民風者錄焉  
嘉靖丙申端陽日長洲陸粲浚明父書於貞山草  
堂



舊志總敘

沈潤卿

吳號澤國而其西境多山自秦餘杭以南迤邐至  
於太湖其間標名紀奇者亦衆矣厥有鄧尉山寔  
臨湖上龍翔鳳翥特立雲表奇麗卓詭稱東南之  
秀焉信人寰之異區霞外之絕境矣山舊名大尖  
東漢鄧尉隱於山中始有是名後晉青州刺史郁  
泰玄葬此故又名玄墓云前世猶未大顯洎勝國  
之末萬峰蔚禪師卓錫其地始創精藍亦名萬峰

厥後緇流相承益勤締構遂成鉅剎其中有清泉  
碧石修竹茂林堂宇皆靜密幽雅談者稱爲吳中  
諸山之冠特未有志之者予雖家郡城而先墓所  
在歲必一再至必徘徊依戀不能舍而去也因爲  
考其事而列焉

鄧尉聖恩寺志凡例

一山占地勝寺占山勝非繪圖幅不能總攬形勢故鐫圖置之卷首

一舊志有本志今因之但欲刊定山名不嫌旁考故特遍加叅詳爲卷之一

一舊志有泉石今亦因之此今昔無改也爲卷之二

一舊志有梵宇有山居今總爲梵宇而以山寺

山菴山居並列以其皆屬淨地也爲卷之三  
一舊志有名釋今欲推重燈傳故分禪祖爲卷  
之四名釋爲卷之五

一舊志止於集詩集文故以 賜詩 敕諭冠  
兩者之首今詩文裒聚旣多臚分各異故特  
尊 聖製不與他作同卷爲卷之六

一昔併菴爲寺寺以初創今改書院爲禪院寺  
以中興又寺額 賜出 天朝稽諸案牘皆

有考據故以奏疏公移爲卷之七

一有寺則有記記所以永寺也故以寺記爲卷之八

一有禪祖則有語錄錄所以行禪也故以語錄爲卷之九

一有錄則有序序所以弁錄也故以錄序爲卷之十

一寺之興與寺之復僧之聚無不取資檀施故

以募疏爲卷之十一

一禪語所繇成錄本於勸請說法故以請疏爲  
卷之十二

一舊志有祠墓介于泉石梵宇之間今志歸重  
禪寺故以塔廟爲卷之十三而祠墓附載不  
盡則有郡邑兩志在也

一有塔則有銘銘所以表塔也故以塔銘爲卷  
之十四

一鐘爲寺鎮法華鐘更爲法寶其因緣功德甚大非他器可比故特列鐘部爲卷之十五

一名山名刹時有名人來游而不盡作記記所以表山刹也故以遊記爲卷之十六

一名人之作記少詩多詩所錄作亦多種總不離山刹故以題詠爲卷之十七

一名文有爲此山作而非前諸條所得類收者當別載以附見故以雜文爲卷之十八其詩

文之外偶拾片語亦資多識故以雜記終焉  
一凡書例有目錄在前今旣已條次其說遂不  
更復出



鄧尉聖恩寺志

圖 凡三各系說

鄧尉山寺形勝圖

鄧尉登山入寺津路圖


聖恩禪寺殿堂樓閣全圖

寺形圖

學寮

東山

海山





鄧尉山寺形勝圖說

鄧尉東自穹窿諸山來結脉最長南北西三面遶湖而聖恩寺坐坎向離居明堂正位具區三萬六千頃當襟攝受漁洋山爲正案莫釐縹緲則遠炤矣七十二峰浮黛出沒亦足點綴勝槩左抱米堆逶迤東南度呂浦石梁仍轉漁洋又爲正拱穹窿鳳凰諸巘聳列外護右抱青芝長旂綿亘西南竺山迴顧湖中而外護則珍珠潭西磧諸高峰也此三龍三鳳人天朝拱之區非大覺金僊不能享非

國師禪祖不能居萬峰開闢於密中興大法聿隆  
天行數值邇遐覩法幢而稽首緇素叩祖塔以合  
尖欣剖公締構之完正


新皇登極之會山靈尙希

詔旨紺宇再勒穹碑則聖恩福利寧止誇揚震旦哉

○舟航東繇胥口過呂浦橋則山南錢家勘施家  
浜躡屩而登或從東北浮履橋轉南則姚家河涉  
柴莊嶺循徑入寺亦爲坦道

王煥如識

登山津路圖





鄧尉登山入寺津路圖說

此鄧尉之西面也寺故南向前圖已攬勝矣茲曷爲又圖蓋山之勢自光福而起人烟輳合舟輿登涉徑深路修而寺乃幽邃山川映帶古刹依巒與震澤之層波相蕩漾尤有情致矧光福枕山之陰爲寺後坎虎山長虹肖龍卧而講寺浮圖則又聖恩翔鳳之尾也其偃仰上下茲合形家之說故萬峰手構獨推佛土之尊代有禪師繼隆燈燄其意義不可弗顯噫嘻東西二崦匯玄武之廣瀦包費



兩河便青舸之繫纜自奉慈以攀石址緣崖蹭蹬  
可循轉銅井以達市墟到處桑麻無間得閒亭畔  
高人寄碩隱之踪司徒廟前全里護棲神之柏種  
種皆助精藍之景人人求添點綴之工鉅姓夜臺  
聆鐘聲而返魄漁翁布艇聞魚唄以收帆普利羣  
生望峰頭指見明月皈心諸佛度嚶下徑躋禪關  
展閱斯圖不僅謂春花秋月夏蔭冬薪誇東南之  
絕勝已也


王煥如識



登封聖恩寺志

寺圖

十五

圖





宋不習繪事竊知汝山川  
地理遠近美險管作東南  
水利江南標治諸國進  
當寧英邑方興湖山獨入  
新志蓋有利民生義不敢  
辭茲辱制大師教誨野  
尉山寺尉九紹隆 佛法  
實初暇休若示筆法殊拙  
則非露野知也榮禎甲中  
亭夏長州徐霖謹識

程邑鉅良封



聖恩禪寺殿堂樓閣全圖說

聖恩寺殿堂樓閣位置皆勑自萬峰禪祖而繼爲  
增拓則虛碧諸師先後手蹟在焉茲協陰陽之宜  
體天人之道動

當宇傾慕啓四衆瞻依凡山之陽皆萬峰淨土厥後法  
裔陵夷析房爲十四值因役累糧逋或轉屬巨室  
爲山房別業擊魚誦唄之所多爲酣歌豔舞之場  
幸神鬼訶譏檀那遮護漢師重振法席剖公嗣響  
宗門羨道之彌高皈心者益盛僧居悉併嘗住棄

壤漸復伽藍施米施錢襁屬而集運材運甃航載  
而來朽腐易以堅新猷邪支以正直金容玉相現  
慈藹於

世尊複道重檐侈嵯峨於氣象

宸翰爲山門永鎮凜森立之屬顛單詞爲頑漢指迷驚  
壁懸之塵棒百遍大悲神呪晝吼鼉音千聲極樂  
彌陀夜聽版寂按堪輿更舊制與東西南北之諸  
寮循故蹟顯芳模窮南北東西之四址剔仆碑于  
草覆培祖塋于榛栖擔水負薪種種助道之力開

荒鑿沼事事服民之勤拾級甫登但見翠筠蔽日  
馮欄四顧轉仰喬木參天豈徒地靈昔年何以幾  
廢全縣人傑今日所以中興謬託東吳識小之遺  
敢揚

西聖剝塵之化

崇禎十七年甲申七月朔婁江王煥如謹識

鄧尉聖恩寺志卷之一

嘉魚熊開元玄年裁定

吳江周永年安期編輯

婁江王煥如仲至叅訂

本志

山距吳城七十里鄉曰長山逶迤十里周圍三十里有  
奇其高五百餘丈中巒隆起東抵遮山遠列穹窿西抵  
銅坑諸山北抵虎山左右岡隴勢若環抱其巖岫聯屬  
昂伏千態石色皆纈潤其間邃閣層樓各據幽勝太湖

縈帶其前法華山浮於波面烟雲明滅頃刻變幻日落  
則頽玉萬頃月明則素練千尺飛帆往來鳬鷗起落凭  
高遠眺心目開朗若夫曉氣凝合霧靄橫斜重巒飛動  
樓臺隱約時有天風引吹白雲彌岩塞谷擁護松檜若  
琪花翠黛掩映白雪別具一種妙象山雨欲來暝雲合  
沓泉飛樹杪溜滴檐端旣而郊原流潤山澤含輝新水  
平塢可坐而濯陰晴夙莫間倏忽異狀此則山之大觀  
也乃至曲徑深蹊艸樹茂密幽庭古砌花竹秀雅觸處  
成景未易殫述郡人固好游大抵先其近者而此以遐



遂故罕及焉然名流逸士探奇選勝者亦累累無虛日  
云

大明一統志

玄墓山在府城西南七十里一名鄧尉山山峰四立林  
木葱蒨前一石竝立太湖中若畫屏然山上有葛峰  
寺樓閣疊蜚湖光掩映亦吳中佳處其山之陰名至  
理山山勢蜿蜒前瞰太湖對峙陽山光福諸山左右  
夾拱山雖北向隆冬入山其氣盎然

盧熊蘇州府志

吳縣山

鄧尉山在縣西七十四里

玄墓山在縣西南七十里卽晉青州刺史郁泰玄墓

王鑒姑蘇誌

鄧尉山在光福里俗名光福山在錦峰西南與玄墓銅

坑諸山聯屬

按聖恩菴開山記作鄧尉山菴在玄墓山之南岡記作玄墓村蓋舊志以袁爲

玄蔚爲尉而各村以山耳後得宋進士葉和甫墓志與舊志相合其東有虎山鳳鳴

岡至理山北有龜峰光福寺在焉其相連諸山有安

山聚塲山朝士塲蟠螭山西磧山

在游湖南彈山卽小雞

山在湖濱土阜也

竺澤叢書小雞出胥門西行四十里過光福市市西五里土多石寡

無大竺山一名觀山茶山  
即續表吾家山即岡山石

帆山褚山邢山游城山  
在游湖北長山皆附鄧尉山

玄墓山相傳郁泰玄葬此故名在鄧尉西南一名萬峰

山山之半南面太湖遠見法華山如屏浮於波面東

有米囤山與石牌至理諸山相連直抵呂山其西則

孫家蟲頭諸山迤邐入於湖心其南爲周山

聖恩菴

在鄧尉山之南岡元至正間僧蔚萬峰自杭來止於此初蔚辭其師千岩請所往答曰汝

名所止也至鄧尉結菴居之其徒大集遂創精藍爲時名利洪武中僧普壽普隱永樂中僧智璿先後重

建內有

碧沼軒

楊循吉吳邑志

光福山盧志云在縣西南七十里姑蘇志云鄆尉山俗名光福山與玄墓銅坑諸山聯屬也

餘山十

安山

在西一里

虎山

北二里

銅井山

蜀山

聚塲山

小雞山

長山

新豐山

錦峰山

西磧山

玄墓山盧志云在縣西南七十里舊云晉青州刺史郁

泰玄葬此故名姑蘇志云玄墓山南面太湖今按此

山有土有石宜松竹楊梅柑橘而梅特盛高大之山

也 寺 萬壽聖恩禪寺 元釋時蔚建

餘山十四

柵山 東 石帆山 呂山 竺山 西 法華山

觀山 吾家山 茶山 茆山 褚山

刑山 雅宜山 周山 漁洋山 並在南

王煥如吳縣志

鄧尉山在光福里錦峰山西南去城七十里漢有鄧尉者隱此故名或作蔚非也北有龜山光福塔在焉前爲鉢孟山山之西北爲虎山中通一溪跨以虹梁曰

虎山橋橋之西南有上嵓袁中郎宏道記云兩峽一溪青巒四匝山前長隄一帶幾與湖埒隄上桃柳相間每三月時紅綠燦爛如萬丈錦其東麓三里有七寶泉鄧尉西行歷烏山觀山朝士塢外窰裏窰熨斗柄西磧山彈山過長旂嶺竺山至玄墓出入湖山間山人以圃爲業尤多樹梅花時一望如雪行數十里香風不絕此吳中絕景也所歷諸山大抵各有致惟西磧最高大少景然在湖濱潭西聚塢差勝潭西一隅色如鐵名鐵山

玄墓山在鄧尉西南六里相連不斷本一山也後晉青州刺史郁泰玄葬此故名 國初萬峰和尚居之又名萬峰袁學憲袞遊記云吳之山惟玄墓最僻亦最奇面湖而險隩丹崖翠閣望之如屏背鄧尉而來法華障其前銅井青芝迤邐其右游龍界其左尤奇在絕頂一登則洞庭諸山悉陷伏於湖而湖波遂混茫蕩爲一色山之麓有奇石在盧橘樹下勢欲飛動山有聖恩寺卽萬峰道場舊法堂在佛殿東北其前銀杏數株皆數百年物歸太僕有光詩曰欲尋老子當

年處五杏叅天寶殿東正指此也其後則奇石在焉  
俗謂之真假山石類太湖天然嵌空以此知湖石玲  
瓏者不盡出水力也但此石頑大非湖石比殿右爲  
郡士徐冽山房今爲漢和尚靜室庭中古桂數株本  
當時屏障今皆七八圍矣縈結甚奇山前面湖法華  
山浮於波面東有錢家坎米堆山顧封公天敘闢有  
五雲洞其山與柴莊嶺石牌諸山相連直抵呂山西  
則孫家嶺蟲頭諸山漸入於湖南爲周山

天壽聖恩禪寺在鄧尉山之右唐天寶間建天壽禪



寺宋寶祐間又建聖恩禪菴元季寺燬菴存萬峰禪  
師時蔚開山說法 本朝洪武九年闢建觀音閣徒  
普壽構法堂又徒普隱等建大殿齋厨三塔院又徒  
普持鑄巨鐘建層樓永樂七年智璿重修大殿建藏  
經閣天王殿方丈山門寮庫碧炤軒正統八年僧道  
立奏請 賜今額嘉靖間鐘爲分宜移去萬曆間僧  
素一修寺如曉募銅鑄鐘如舊雲棲僧智在謀建鐘  
樓郡士徐列捨山房復虛碧塔院崇禎元年吳江知  
縣熊開元延三峰法藏主席建大法堂僧炤覺又修

萬峰塔院建文殊堂崇禎三年金粟圖悟又移堂院  
左今兩院並峙六年法藏修大殿佛閣建方丈并規  
畫重建天王殿山門屬徒弘壁成之壁又建大悲堂  
及造毘盧像造大藏經供佛閣

順治十年經閣成復  
遷大藏供于閣上

### 陸應陽廣輿記

玄墓山

府城西吳之山惟玄墓最僻亦最奇面湖而險  
丹崖翠閣望之如畫相傳郁泰玄葬此故名一

名萬

峰山

鄧尉山

玄墓之北俗  
名光福山

按玄墓鄧尉郡邑志皆分爲兩山而山志則合爲一

山今俗亦通稱玄墓間呼鄧尉要不能不以一山兩名如一統志所載爲準矣

山之左岡曰米堆山突然高聳如米瀉之狀其南爲呂山舊有胡堅嘗墓廬因名胡菴山後以呂姓蕃衍遂易今稱

米堆後有柴莊嶺石牌山山後爲東西山姚二場姚蓋亦山中著姓也又有場名章墳其北有學士場及南北山場二場

志里村光福里有虎山相傳吳王闔閭養虎於此下有

崦中界石梁名虎山橋因稱東西三崦又名上下三  
崦四周皆山圍合映帶最爲奇勝人謂吳中山本佳  
處無踰此者

山西嶺曰竺山環繞抵於湖其後爲長旂嶺聚塢北折  
爲山之西麓有幙山市墟前後雀梅蓬在址西橋市  
堰諸村

山南居民數家爲袁墓村其西爲陸家塢又有村名西  
灣竺山渚云

鄧尉聖恩寺志卷之一

終

鄧尉聖恩寺志卷之二

泉石

七寶泉在山東麓僧於岩下鑿池貯之結亭於前泉從其下流出伐竹爲筧引之味殊甘冽其南有玉泉一泓清澈可鑑僧結廬其上山西麓有壽岩泉與七寶泉相背疑本一脉也

八德泉舊名沸珠在寺之西南近河平田內因水沸如珠故名後人砌甃方池覆以大石年遠仍廢迨崇禎戊寅大旱徧山水少惟此泉盈滿遠近人民競汲不竭日

供寺泉三百餘其味冲澹甘潔烹煮有異色鄉人縹緇俱用此水爲佳品

法乳泉在西山祇林後萬曆初忽從石罅流出土人鑿池深二尺許嘗盈不涸味甘清冽

井有四一在喝石下名中井大旱不涸近者接竹引之

一在齋厨外一臨山半

卽巧山下

一在僧室簷下

又井四一在山門西南茶園前一在上陽村大路南一在聖恩下院齋厨前一在香光室左皆甘潔

山南鄧太尉廟東有一井名曰龍眼俗呼三角竺山廟

有井亦名龍眼其味俱與嘗水異

萬工池在聖恩下院東南大路傍放生池在純白窩前  
鉅石在天開圖畫僧室後天順間忽於土中露見稜鏐  
扣之琤琤遂加剔濯巉巖洞越巧若天成舊刻獅子岫  
棲禪洞螺髻峰滌硯泉凌空橋削壁岩流雲澗海湧門  
八題於上

今廢

山之絕磴東上又有巧石俗呼真假山青碧奇絕前有  
望湖亭今廢西下有喝石相傳萬峰師穿井有巨石上  
墜師呵止之遂名

鄧尉聖恩寺志卷之二

終



鄧尉聖恩寺志卷之三

梵宇

山寺

山寺舊名聖恩菴宋寶祐間建天順間 賜額爲聖恩  
禪寺初萬峰蔚禪師旣創菴居復得葉和甫所葬碑  
石欣然若有宿契遂盛作佛宇其後有普壽智璿道  
清道宗以下相繼修建樓閣傑聳與林谷相輝映遂  
爲西山叢林甲乙焉中有大雄殿上設釋迦彌陀藥  
師像繞以十八羅漢其天神二十則侍立焉左爲鐘

樓殿之前爲天王殿立高皇帝賜無念御製詩  
碑刻又前爲金剛殿其東立小山門以便出入殿之  
後有毘盧寶閣中設毘盧遮那像環列十二圓覺相  
棟列無名佛萬計又名萬佛閣下奉觀音大士像傍  
度經律論三藏書五千軸閣後爲禪堂中設憍陳如  
像旁設廣榻則修其學者列焉其左有大悲殿後爲  
法堂堂左屋以奉釋初祖達磨及中峰萬峰二師亦  
有祖師堂右屋爲伽藍神趙松雪書扁其東爲齋堂  
扁曰香積庾庫庖漏二十餘楹寺旣有名額人慕萬

峰道行又稱萬峰寺云

以上係舊志文以下據見在記

大雄寶殿宋寶祐年間創始至明洪武二十年丁卯四月開山始祖時蔚鼎建正統元年丙辰閏六月住持智璿重修崇禎八年乙亥七月住持法藏又重修於大清順治十四年丁酉七月十一日住持弘璧同耆舊戒萃監寺濟如照聞等重新鼎建

毘盧閣亦名梵天閣在大殿後正統十年乙丑六月住持道清鼎建崇禎七年甲戌十一月住持法藏重修

上層順治十三年冬住持弘璧又修下層

大法堂在佛閣後永樂十四年丙申十二月住持智璠  
鼎建廢久基存於順治五年戊子正月初六日住持  
弘璧同濟据濟如等重建

舊方丈在法堂後地益高山之最深處也其後有美石  
嵌空玲瓏森然離立前臨虛壑瞰太湖諸峰於欄檻  
外洪武九年丙辰開山萬峰蔚祖創建太常卿程南  
雲扁曰天開圖畫隆慶間杖朝頑健吳涵復扁東爲  
雙梧軒少師姚廣孝題西有碧照軒主事陳亢宗書

後有室曰萬峰深處卽蔚祖寢堂並廢基存今樹

景 英二廟

御碑永鎮於上

恢復事蹟別見

東關在佛閣左順治十五年戊戌冬建

伽藍堂在大殿左

祖師堂在大殿右順治戊戌三月重建

天王殿在大殿前景泰七年丙子五月住持道清鼎建

崇禎八年乙亥十二月二十六日住持法藏同門人

弘璧監寺濟教等重建洞庭優婆夷法名濟後捐貲

協建中奉彌勒像傍列四天王彌勒像後立

高皇帝 賜無念 御製詩碑南向懸

敕賜聖恩禪寺扁

皆 大明天順三年歲次己卯五月吉日題

金剛殿在天王殿前正統十一年丙寅三月住持道清

鼎建 今廢

三門在天王殿前順治五年戊子正月初六日建卽金

剛殿基

香花橋在金剛殿左正統十四年己巳七月石城萬壽

寺住持宗學捐貲獨力建本寺釋道清題

石刻在橋南下

鐘樓在大殿東南洪武二十一年戊辰寶藏持禪師建

崇禎七年甲戌四月初九日住持法藏同堂主性貢  
重建上懸法華鉅鐘下設舍那佛像

事蹟別見

大悲殿在佛閣西北隅卽棲雲山居故址崇禎十年丁  
丑八月初七日住持弘璧鼎建海虞譚于墀爲求嗣  
捐貲協建

南廊在大悲殿前長廊在大悲殿左一指軒在長廊中  
間俱崇禎己卯年建

拈花堂在南詢堂前卽虛碧齋禪師退居故址崇禎二  
年己巳六月十六日住持法藏同監寺濟萃堂主性

貢等鼎建

事蹟記云璿禪師以僧臘之高謝事退隱同袍寶藏持禪師典其事又師塏銘云營

策退居塏院二所俱備又云瘞於祖塏之左倚於本寺之右崇禎六年癸酉按察御史陳公乾陽置額題爲萬峰禪院興復事蹟別見

方丈在拈花堂西北於密塏院前崇禎三年庚午四月

住持法藏建

華嚴壇在方丈後塏院左順治十年癸巳閏六月十二

日住持弘璧鼎建

東廂樓在壇之左順治十一年甲午三月二十五日建

西廂樓在壇之右四月二十日建



藏經閣在新法堂右順治十年癸巳十一月二十二日

鼎建

溫研寮乾室在方丈右肩崇禎壬申年建

證心室在方丈左肩崇禎四年辛未建藏禪師爲諸子

入室處

舫齋又名船屋在證心室前崇禎壬申年建

侍寮在證心室左茶室在侍寮左

精進堂在拈花堂右肩崇禎三年庚午八月住持法藏

鼎建

大歇關在拈花堂西南精進堂前永樂十四年丙申建  
卽虛碧璿禪師退居天啓五年乙丑藏禪師於此著  
濟宗頌重修

叢桂齋在大歇關前崇禎十一年戊寅二月十七日住  
持弘璧建

廂樓在叢桂齋右崇禎十五年壬午八月二十日建  
南詢堂在大悲殿前順治七年庚寅十月十五日建  
四宜堂在拈花堂前永樂十四年丙申建卽虛碧璿禪  
師退居於大清順治十三年歲次乙未九月初三甲

申日子時重建

庫房米廩並在白衣閣後崇禎四年十月住持法藏建  
經書樓在四宜堂西南叢桂齋前庚子十一月日建  
小樓在庫房右崇禎十五年壬午十二月十八日建  
白衣閣在拈花堂東南庫房前崇禎十四年辛巳二月  
初三日住持弘璧同監寺濟觀等鼎建上奉白衣大  
士像

還元閣在白衣閣前順治五年戊子三月建

禪悅堂在大殿左肩順治十五年戊戌二月初八日建

香積廚在大殿右肩戊戌十月初六日建

悟因堂澡室在大歇關右

茶房延壽堂印房在還元閣前順治庚寅年建

卽心堂新樓行寮淨所俱在叢桂齋西南一帶崇禎四年辛未十一月建

純白窩在寺西崇禎六年癸酉七月二十日住持法藏鼎建開荒鑿池置飯僧田三百六十餘畝有撫按府縣免役碑建大義堂放生所諸堂室永爲聖恩下院舊法堂在大殿東北隅洪武九年丙辰開山萬峰蔚祖

鼎建正德二年丁卯七月十一日練川普炤禪寺住持明遵重建

南菜園在山門下大路南順治八年四月十一日建

茶園在山門西南萬工池右順治七年三月初三日建

西山靜室在田庄西北順治十三年五月十六日建

西菜園在寺西萬工池東南順治十五年十月二十日

建

碧雲庵在寺東柴庄嶺順治十五年十月聖恩常住恢

復重修

天壽寺在寺西真如塢順治七年歲次庚寅十一月十五日丑時住山沙門弘璧鼎建

新菴又名善慶在市墟舊爲邵武知府徐公濟墓廬又有東菴其北有石址菴卽宋黃策祠

正覺菴在陸家塢元元統二年甲戌僧大楫建廢久其方池尚存西南爲長旂嶺有鳳翔菴宋咸淳元年乙丑僧椿壽建舊傳其下蓮池最勝今不存

五十三叅舊名善財房在本寺右永樂十二年萬峰的嗣虛碧璿禪師鼎建隆萬間荒廢遂爲民間別業崇禎七年僧性乘同徒海慈募資恢復崇禎十四年蔡懋德捐資爲僧濟炤倡首重修

妙高菴在本山後萬曆丙辰年僧一輪開創崇禎八年  
乙亥僧寂聞重修左有井清冽味殊

山居

紫雲居在舊法堂後初蔚禪師卓錫之地王文靖公汝  
玉題扁其東上爲東山居門徑幽僻林樾交覆中有

松雲堂尤多美竹

今廢

南園在小山門東南下路數折而入皆松竹環繞又有

流泉經其左岡清潔可愛

今廢

棲雲山居在禪堂西北結廬負巖開厨映竹臨眺澄湖



於長松之下青爽特甚左有瑞雲軒西隱皆高竹喬  
松密布前後有危樓中聳推窓青鬱觀者灑然易處  
信佳處也樓左右有筠隱蒼雪二軒或題爲竹塢云  
並廢今建大悲殿於上

碑記別見

古松山房地僻多美竹東小徑入澄湛軒尤靜美其中  
和房壽椿房慶雲精舍萬峰塔院皆據巖壑勝處匪  
其緣弗能居也

獅子窟在三峰塔院後崇禎二年己巳住持法藏構  
巢居在善財房南崇禎五年二月十六僧清印建

香光室在聖恩下院西北崇禎六年癸酉十月法藏構  
蓮花居在香光室左崇禎十四年辛巳八月老宿海舒  
構於此專修淨業

歇心居在鐘樓東崇禎十一年戊寅五月僧濟長濟時  
同建

祇林在香光室北

鄧尉聖恩寺志卷之三終

鄧尉聖恩寺志卷之四

禪祖

聖恩禪寺開山祖師萬峰蔚公傳

承德郎刑部主事永嘉陳亢宗述并書篆

師諱時蔚字萬峰出溫州樂清金氏母鄭夢儒釋二人  
入其寢覺而生二子師居末適有光燭室鄭懼欲弗舉  
其姑保而有之襁抱中見僧輒微笑作合掌態父母度  
不可留使禮越之永慶寺昇講主爲師時年十一嘗誦  
法華經至諸法從本來常自寂滅相忽有省遂入杭受

具叅止岩禪師於虎跑示以南泉三不是語別入達蓬  
山卓菴佛跡寺故址晝夜究竟岩語至忘寢食一日寺  
主宗律師舉似瀉山淨瓶公案觸所叅卽說偈云顛顛  
倒倒老南泉累我工夫却半年當下若能親薦得如何  
不進劈胸拳遂往見岩詰前語獻偈云南泉正是惱人  
心更要將心去覓心不是心今不是佛性天寬廓有何  
尋復之華頂訪無見覩公見問從何處來師云從杭州  
來曾見何人師云止岩和尚有何指示師云南泉三不  
是見云我這裡南泉三不是卽不問如何是萬法歸一

師曰從生至死皆無一又問如何是一歸何處師近前  
叉手云不審見云且居山保守還返達蓬獨處者十稔  
已而往伏龍山中謁千岩禪師初入室問將甚麼與老  
僧相見師豎拳頭云這裡與和尚相見岩問死了燒了  
向何處安身立命師云漚生漚滅水還在風息波平月  
映潭岩復云莫要請益受戒麼師卽掩耳而去明日復  
請衆斫松師拈圓石作獻珠狀云請和尚酬價岩云不  
值半文錢師云瞎岩云我也瞎你也瞎師云瞎瞎卽說  
偈云龍宮女子將珠獻價值三千與大千却被傍觀人

決破誰知不值半文錢岩顧昭首座曰蔚山主頗有衲  
僧氣味煩請歸堂比佛誕日岩上堂云今日有三種好  
事一者世尊降誕二者天道晴明三者有大施主設齋  
若向此三種好事上識得老僧舌頭落處日銷萬兩黃金  
師從西過東一手指天一手指地云天中天天中天  
釋迦彌勒誰後先岩云大獅子吼過了也還有小獅子  
麼未幾復還佛跡岩遺以衣拂各一并偈一首見千岩  
語錄中旣而移居嵩山閱九載岩三爲手書招之所以  
愛重期待者甚厚比至請與分座尋返嵩山岩囑云汝

緣在浙西可往化導大振吾宗遂以元末己丑年入吳  
凡三築精藍卒之玄墓鄧尉山中卓錫半山斬蒙羃結  
菴居之久之四衆歸嚮乃構爲大伽藍號曰聖恩自是  
緇素奔湊遠邇雲集師隨機開導俾滿意欲初不爲雕  
琢語故人益慕而信之一日忽沐浴更衣召衆訣別書  
偈曰七十九年一味杜田懸崖撒手杲日當天遂趺坐  
而逝時洪武十四年正月二十九日也龕留十有三日  
顏色如生傾城聚觀膜拜瞻嘆其徒普壽等奉全身合  
二缶瘞菴之西崗遵治命也師貌古而清髭鬚疎秀寡

緣飾千岩常稱其純粹質樸有古人氣象深得之矣師歿垂四十年吳人無少長咸知尊慕其行嘉湖諸郡至有繪其像而事之者其生卒之辰遠邇畢集如其生時而傑閣重樓逾增舊觀焚修之徒數常滿百巋然爲一大叢林雖宿號名山盛刹者或未之能先焉岩所囑者益又驗矣師平生未嘗讀書惟以深悟自得其形諸語默者俱能刊落浮華而一踐乎實其徒普壽等輯爲萬峰語錄一帙鋟梓流行然非師志也其所度弟子若干人而勝學無念者獨號能紹其傳云贊曰昔中峰普應



國師以臨濟正宗振耀天目得其心印者弟子千岩也  
千岩再傳而師實承之厥後無念學公復親受師衣法  
之付受知 太祖高皇帝龍章寵錫雲漢昭回天目淵  
源遂爲有托師所付得人矣嗚呼盛哉

永樂十七年八月二十九日徒弟比丘智璿立石

又山志舊載

萬峰禪師溫之樂清金氏子名時蔚始學於餘杭山中  
將出游辭其師千岩請所止答曰汝名汝所止也後至  
鄧尉將結菴其地乞諸葉承三氏葉初不許後見其智

慧能知未來遂捨與之始創精藍其徒大集師深造物  
諦詞翰亦奇古嘗作偈題其山云玄高向午面朝湖三  
鳳三龍天下無左右環盤前後濶此山真好立禪徒師  
居此凡三十餘年一日告衆曰吾時至矣又囑其徒而  
今而後汝等須向山間林下鑊頭邊接引一個半個闡  
揚吾道不可攀高接貴輕慢下流逐利追名迷真惑道  
如今末法將沉汝等慎之乃趺坐說偈曰七十九年一  
味杜田懸崖撒手杲日當天語畢而終所遺語錄命悉  
火之曰從上佛祖言說後學畧不聽從况吾區區杜田

話柄其門人掇拾所遺撰次成卷行世先是其徒鑑無  
礙欲候師涅槃葬之金山師聞而致書謝焉其語尤異  
又自題其像皆援古驗今詞旨蘄絕今寺西北有塔院  
師葬處也翰林侍讀王公達善銘載異蹟甚悉爲開山  
始祖

又

陸 粲

吳西山聖恩寺僧時蔚號萬峰溫州樂清金氏子元末  
名僧長千巖高弟也初學成請於師出遊師謂曰汝逢  
汝名卽住至蘇州止於鄧尉山東麓曰玄基建大蘭若

初未嘗識字既超悟禪乘遂能作詩偈語皆可誦雖僧服而不去鬚髮自爲贊有束髮辦頭陀留鬚表丈夫之句洪武辛酉 朝廷聞其名使 徵之使未至之七日蔚已前知謂其徒無念曰吾與之無緣汝當 召吾今去矣遂沐浴入涅槃遺令毋焚尸越十三日肢體猶溫以磁缸覆尸而葬無念入 覲大被 寵錫後往湖廣之九峰寺與蔚埒望焉蔚素精堪輿家常言玄墓形勢三龍三鳳勝絕天下卜葬者多扣之蔚未常輕答也老患疾氣語其徒曰吾當服城中沈以潛藥吾與之有緣

也彼在京師今夕且歸矣宜往速之徒如教至沈氏則以潛初未歸也返命又遣之往及夜因寢其家門下待之二鼓以潛果歸聞其言異焉卽往治疾旣瘥蔚謂曰荷君治疾無以爲報有地於此請奉以爲太夫人壽域因指示竺山後一穴稍下六尺云是雖微劣至六十年後家大發後以潛竟以葬母至成化間以潛諸孫屢等皆富甲其里布政使肅諭德燾數人相繼取科第門戶赫奕距葬時恰及六十年矣予聞諸以潛末孫注者如此然留鬚之說實石室僧語意謂非蹈襲殆是偶合

耳

又續吳先賢讚

劉鳳

時蔚樂清人姓金氏學其道者稱祖焉傳法於千巖來  
吳玄墓聚橡栗藜藿而食之或累日不進開立宗教建  
寺設壇授受其徒甚盛名萬峰師洪武辛酉召之蔚  
已預知趺坐而逝使至已無及數日肢體猶溫如生

無念勝學禪師傳

釋弘璧

無念勝學禪師萬峰嗣德安府隨州應山人父姓陳母  
周氏元天曆元祀戊辰八月十九日子時生九歲禮本

郡寶林寺無極緣公爲師初不識字執苦經年自覺已  
事不明往叅荊州無聞和尚開示萬法歸一一歸何處  
公案師驟發大疑日夜提叅復歸寶林廿有二歲往宜  
州登壇受戒後入嵩山住靜履影不出常穿一衲脇不  
沾席精進逼拶一日豁然有省偈曰數載東山昏霧濛  
凭欄終日待晴空夜來忽覩霜天月萬象全彰一鏡中  
由是遍訪海嶽耆宿東抵姑蘇玄墓叅萬峰蔚和尚機  
語相契峰親書法語付僧伽梨以偈證之復回寶林道  
風昭著緇素敬慕後楚昭王建剎延師居之洪武間

太祖召至 奉天殿 賜坐 上問法要師進偈 上  
覽之大悅 御製詩文賜之今勒碑鎮寺永樂三年乙  
酉十一月二十九日師說偈曰世尊七十九無念八十  
邊打破華藏海依舊水連天儼然而逝世壽七十八僧  
臘五十七全身塔於獅子巖謚清福廣慧禪師

虛碧智璿禪師

虛碧智璿禪師萬峰嗣蘇州吳縣長山鄉顧氏子語錄  
未見塔銘存寺爲聖恩第二代住持

寶藏普持禪師



寶藏普持禪師萬峰嗣姓氏未詳語錄塔銘並無存但  
聖恩事蹟記中有僧錄實公爲撰靈骨塔銘萬峰禪師  
付法與師偈云大愚肋下痛還拳三要三玄絕正偏臨  
濟窟中獅子子燈燈續燄古今傳爲聖恩第三代住持

本義禪師

本義禪師萬峰嗣有語錄若干卷今失

普榮禪師

普榮禪師初叅萬峰勤於問道猶兼苦行得峰激勵憤  
志叅究七日而悟

寶曆寺志 卷四  
碧潭道清禪師

碧潭道清禪師虛碧嗣嘗受知于巡撫侍郎周文襄公  
忱延之住山所居有虬松倚巖結鶴巢於上趺焉語錄  
塔銘俱失其行業載事蹟碑記爲聖恩第四代住持

聖恩道宗晏禪師

聖恩道宗禪師虛碧嗣蘇之嘗熟人語錄塔銘俱失景  
泰中 詔修保國道場感五彩祥雲繚繞光明炤耀特  
降 敕褒諭師復於天順三年五月十九日奏 請寺  
額有 敕文割付勒碑永鎮於寺爲聖恩第五代住持

善祐禪師

善祐禪師虛碧嗣能詩有禪學亦於景泰中召爲宗

師卒 賜諭祭

東明虛白慧岵禪師

東明虛白慧岵禪師寶藏嗣年十四於丹陽妙覺寺禮湛然師薙髮受戒叅雲間松隱叩其心印然未心肯自誓若不徹證不已因禪定六旬出定舉首覩松豁然有省尋至蘇之玄墓聖恩寺見果林和尚針芥相投復指示見寶藏持禪師具陳悟因藏叱之曰佛法如大海轉

入轉深那得泊在這裏師遂親炙座下藏一日問曰心  
不是佛智不是道汝云何會師向前問訊叉手而立藏  
呵曰汝在此許多時還作這個見解師乃發憤忘寢食  
至第二夜驀然徹法源底呈偈曰一拳打破太虛空百  
億須彌不露蹤借問個中誰是主扶桑湧出一輪紅藏  
笑曰雖然如是也須善自護持時節旣至其理自彰

海舟普慈禪師畧傳

海舟普慈禪師蘇之常熟人姓錢世宗儒業出家於破  
山初至慧日寺聽講楞嚴至但有言說都無實義處乃

曰言說今日愈多矣遂歸日夜閱經尋思實義面顏日  
悴有居士問曰師顏色有病師云佛法不明故爾非病  
也士曰佛法不明何不往府中鄧尉山問取萬峰和尚  
去師聞欣然便詣鄧尉見萬峰峰問曰沙彌何來師禮  
拜起曰嘗熟峰曰到此何爲師舉前話再拜求示峰便  
劈頭兩棒攔背一踏以脚兩踢曰只這是實義師有省  
起曰好只好大費和尚心力峰笑而許之付以偈曰龜  
毛付囑與兒孫兔角拈來要問津一喝耳聾三日去箇  
中消息許誰親又曰子當匿跡護持莫輕爲人師範師

自以爲得乃結廬於洞庭山場廿有九年一日僧至師  
問曰上座何處來曰安溪曰安溪有人麼曰有虛白和  
尚說法不異高峰曰是誰弟子曰寶藏曰有甚言句僧  
舉室中驗人語云心不是佛智不是道三藏不是法是  
甚麼下語者皆不契舉畢復問師曰叅寶藏否師曰我  
與寶藏同叅萬峰僧曰當日有何所見遂隱於此就再  
不叅人去師曰問但有言說都無實義峰便打我從此  
得悟僧曰請言得之所以師曰但要人知痛痒的是實  
義是妙心言說盡屬皮毛僧笑曰若據此見解生死尚

未了何得云悟未在未在不見道心不是佛智不是道  
耶師遂有疑曰彼處衆中有真大徹者麼僧云無師卽  
棄菴渡湖往安溪詣東明適有人設齋師至關前問明  
曰今日齋是甚麼滋味明曰到口方知說卽遠矣師曰  
如何是到口味明卽打滅燈曰識得燈光何處着落味  
卽到口師無語次日黎明遣侍者請師師卽至明問曰  
曾見人否師笑曰見只見一人說出恐驚人明曰假使  
親見釋迦依然是個俗漢但說何妨師曰萬峰明曰爲  
敘先後耶爲佛法耶若敘先後萬峰會下有千人若論

佛法老闍黎佛法未夢見在何驚之有若親見萬峰萬  
峰卽今在甚麼處師面赤惘然明曰若如此不曾見萬  
峰師歸客寮三晝夜寢食俱忘偶值香燈繩斷墮地忽  
然大悟詣關前呈悟繇明曰老闍黎承嗣萬峰去師曰  
白公爲我打徹豈得承嗣萬峰明乃笑遂集衆出關陞  
座曰瞿曇有意向誰傳迦葉無端開笑顏到此豈容七  
佛長文殊面赤也茫然今朝好笑東明事千古令人費  
唾涎幸得海公忘我我濟宗一脉續綿綿乃擲下拄杖  
云千觔擔子方全付玄要如今拄杖談以拂子擊三下



下座師卽入方丈禮謝明曰老僧不出月去也至廿七  
夜辭衆廿九日示寂師仍欲遁歸洞庭四衆苦留乃繼  
其席萬峰忌日師拈香指其曰我幾淹殺你甕裏幸是  
普慈若是別人不可救也焚此瓣香堪酬接引喝一喝  
云只笑你護短沒頭師佛法當人情展坐具禮拜又拈  
香云此一瓣香供養東明長老一片赤心鞭策令余洞  
達宗源連喝兩喝云一言豈盡普慈心千古兒孫贊報  
恩又拈香云此瓣香供養昔日師僧指南之力若不蒙  
師何絲今日他日到來拄杖三十喫有分堪報不報之

恩喝一喝云受恩深處便爲家有乳方知是阿娘禮拜  
起說偈曰源頭只在喝中存三要三玄四主賓五棒當  
人言下會四料還須句裏明末後真機死活句箇中消  
息在師承碎形粉骨酬師德將此深心報佛恩慟哭歸  
方丈臨示寂說偈曰九十六年於世七十四載爲僧中  
間多少誦訛一見東明消殞以佛子打○云釋迦至我  
六十二世有不可數老和尚又打○云多向者裏安身  
咄乃投筆而逝在景泰元年全身塔於東明左側得法  
十二人

天壽聖恩藏禪師行狀

師諱法藏字於密初住三峰人皆以三峰和尚稱梁谿蘇氏子父蘭母周氏家世奉齋師生而穎異狀貌脩偉有大志八歲患痘疹值洪水破岸將及床見玄龜如盤師下床入水乘之因成瘵十五就醫于五牧之德慶菴禮佛心動遂念曰世間法無足聖者歸告父母求出家許之割田以給衣食囑曰必無爲經懺僧他日當拯我于塵勞也師謹佩其言然性高曠不事事留心筆墨間以事清散雖不能卽爲淵灝之學而闕題拈韻錯趾于

文人伍與廉憲薛純臺諸公爲世外交嘗語同輩曰吾四十當悟道六十歲死矣問者曰子不修行安期悟道師曰時未至尚當遊觀耳且公以何法爲修行乎聞者皆異之二十九歲見高峰語錄開卷悵然隱隱若能記憶遂決志叅禪是歲受戒于雲棲又八年受具于靈谷又明年住海虞之三峰如是十餘年中費盡心力虛檐破壁草屋蘿牆食荳滓衣補綴不以爲苦嘗叅萬法歸一一歸何處話目不交睫脇不至席夜中爲昏沉所罩師乃懸巨板于座側命徒衆分香擊板佛聲徹天每嘆

曰嘗言四十悟道若有可憑今三十有八矣而徒勞若是豈終負此語乎于是惶懼泣不自禁至欲養髮入醫卜不受十方茶飯俟叅透再來其懼罪福如此至萬曆壬子師年四十叅究愈猛必以得悟爲期適峰中有老宿朗泉者閉不語關師乘便求入才與老宿相拜下忽眩暈吐痰斗許放身一睡五日不知人事會窓外有二僧夾籬折大竹聲若迅雷師自枕中躍起頓得心空至夜聞兩堂課誦鐘鼓之音如在自已身中歷歷落落毫無間隔覺得身遍虛空坐一夜如彈指復念曰此正古

人所謂前後際斷不可坐着乃盡力推究忽于青州布衫打失鼻孔凡祖師言句一時會盡自此觸處皆悟轉悟轉深尤于高峰睡中主得大受用乃作偈曰一口棺材三隻釘聲聲斧子送平生自從薤露悲歌斷羸得朝朝墓栢青嘗叅三玄要四十餘日心不異緣痰癘發于左背自腫及潰了不經意後脫衣膿血膠凍始覺乃歎曰使我有師如汾陽輩當不致十年墮荆棘岐路矣言畢泣下既會得兩堂首座同喝意旨宛與覺範所著臨濟正宗符合一契如五百年前對面親印遂欣然奉高

峰爲印心覺範爲印法且傷覺公無後意欲遙嗣之又復携杖笠游浙東遡匡廬興得一二具眼者爲法中水乳而禪風絕響轉覺調高不第獅絃不振而師且幾爲破琴計矣于是閉門高臥唯以所得質之古人研極五宗之妙著五宗原時海內衲子望風雲集未幾太倉之慧壽吳門之北禪迎師開法師至不正位不登座惟隨宜起發而已或問其故師曰威音已後不許無師自任若一旦稱師據座則未得謂得者易啓便門吾罪深矣或指見五乳師曰此老固菩薩人也吾所欲嗣者臨濟

兒孫何可因彼盛名更吾志哉後聞天童悟和尚出世  
金粟師策杖從之甫至粟卽上堂告衆曰漢公悟處真  
實學大而名先出世于我所以屈身來此者爲臨濟源  
流耳老僧從來不易安首座今以累漢公卽日請師爲  
第一座師請粟上堂粟舉百丈再叅馬祖黃檗接臨濟  
公案師出衆禮拜起便喝粟云好一喝師又喝粟云你  
更試喝一喝看師禮拜歸衆粟顧師復舉僧問古德云  
朗月當空時如何德云猶是堦下漢僧云請師接上堦  
德云月落後相見粟云且道既是月落後又如何相見



師便出法堂栗便下座由是師資道合若龍驤雲起識者咸服吾師荷法之誠而天童之道亦自此愈尊矣未幾請及堂與中事栗不應良久曰宗旨太密嗣續難乎其人不若已之師曰不然黃龍有云學者欺詐之弊不以如來知見之慧密而煅之何由能盡且古人建立宗旨千牢百固尚有乘虛接響者混我真宗若師家大法不明無從辯驗則胡喝亂棒羣然而起吾宗掃地矣遂辭去栗手書源流信拂親至蔡子穀靜室面付師師不受起更衣潛入舟中侍者密收之師覺叱曰辭受之間

大故有道何得草草竟作書辭還之曰聞和尚爲高峰的骨兒孫故訪大法于座下承一面相許謬及源流真如饑逢王膳所以未敢受者只以法中微密尚未脗合云云復遣座元一嘿詣栗謝過栗仍取源流付嘿曰漢公欲建宗旨出于至誠老僧但恐多事耳彼旣知此聽其自爲何拒之堅乎嘿拜受以歸師怏怏丙寅秋杭之安隱寺請師開法先是雲門湛和尚聞師煅煉學者有三七日中了畢大事之說終歲罵詈數爲魔外及見師語錄驚曰真古佛再來也是年安隱請湛說法湛以手

書邀師爲第一座師方至而湛先示寂檀越悟其旨遂請師開堂而天童悟和尚復遣僧齋伽黎至師始陞座拈香嗣天童爲臨濟三十一代正受海內衲僧北面之禮自此玄風大唱師縱其機辯以煅四方學者猶喜接賢士大夫多爲闡明河洛之旨間拈學庸諸書開其理障聞者如撥雲翳而士大夫亦樂從之如蔡雲怡劉長倩十數公皆親受印契嘗謂門弟子曰小得小悟誠不足戀直須窮盡源底得大歇場乃可耳妙喜云大悟一十八遍小悟不記其數豈欺我哉乃取覺範智證傳提

而滿之痛宗旨滅裂凡所演說極力匡救不嫌重複不顧誹謗不避名位但爲宗旨障者皆指而斥之弟子慮禍及請少貶師正色曰吾欲存趙孤耳夫程嬰公孫氏非聞道也義有所激遂爲人之所不能爲公等爲如來子而輕法惜身若是非所望也歲丁卯值文姚兩太史及徐氏諸護法請師住玄墓山聖恩禪寺寺先爲國初萬峰蔚禪師道場師于蔚爲十一世孫欣然應請及至蕭條荒落龍碑獅座盡置之荆棘瓦礫中唯舊屋數間而衲子幾無宿處師捐衣鉢率衆力凡有供施無公

私盡付修造開田鑿池以供禪侶而有吳江邑侯熊公  
魚山數造法席盡弟子禮嘗敘師語曰禘不知而指掌  
道無示以拈花三峰手洙泗乎不可得而測之矣其敬  
服如此且爲助土木之役頓還舊觀俾酒人歌舞之場  
復歸叢刹師之力也然師開發洞達菟微剔隱如秦鏡  
炤人肝膽畢現雖不欲易近者猶復歸之如過毘陵而  
郡守洪公半石下車折節聞法生信解任之後數千里  
馳書入山乞法名爲門弟子至維揚緇素擁護羅拜道  
側者幾以萬計杖履爲之不前至虎林士庶縉紳千餘

人日就聽法莫不凜然欽慕嘆未曾有師平時臨衆嚴  
憚學者以爲寡恩師聞之亦不介意嘗見僧衣履鮮潔  
誠曰老僧習性柔鷲不能身先風雨殆以早年未得親  
近真善知識使汝等無所取法有愧先賢我之罪也嗣  
是浮泛之倫稍稍引去惟法中數子雖饑餓不忍舍師  
生平以大慧禪師竹篋子話接人更加精削使學者剷  
去聖凡知見向觸背兩關不得處直下如銀山鐵壁往  
往有三七日中撞斷消息者嘗榜門曰宅破家亡阿誰  
是主縫開楔棒是何意旨掛拂捲席因甚不住新到下

語相契請以客禮見或者已爲諸方稱賞自謂飽叅造  
師門墻咸遭點額又有四殺雄語爲室中鑪鞴苟非真  
子難獲髻珠于是梟獍之徒兩相激怒使法中父子同  
室操戈門外遊人吠虛指影師嘆曰法數如此豈能強  
乎因慨然有離世之想矣甲戌六月冒暑歸故里重瘞  
父母以竣其志隆冬過蘇閬遍詣檀越懽笑畢日囑以  
山中常住若預辭焉乙亥春自松陵還脾病遂作師命  
知事造龕索諸子悟由翻覆勘驗以宗印付之戒其住  
山深蓄常住巨細盡付知事人乃以手書示清涼徹并

諸護法其畧曰白牛固水草尋常然而脚下無私要行  
便行矣又招劉長倩曰吾說法意思欲大休然飲食如  
常木龕正造居士若來尚當一笑也于是遠近奔驟應  
接無虛日緇素索遺語手不停筆四月廿八日問龕成  
不知事以材木未備爲對師曰是何不相信耶命速成  
之至五月初二日謂衆曰吾不死但久勞筆舌思欲大  
睡一覺耳令以方丈爲死關署其門曰自埋顏其堂曰  
歇處指後地曰可爲塔基遂掩戶月餘雖弟子不見其  
面適雲怡居士同瑞光徹公入山省候請開關師從之



卽日命剖石壁爲聖恩第二代面囑蔡公始終護法又數日龕成師強起視之微笑移時復就寢侍者問如何是身後事師曰床頭老鼠偷殘藥壁上孤燈炤舊衣衆黯然侍者復欲問師舉手曰放下幔子着遂酣睡至中夜索浴更衣泊然而逝乙亥七月廿二日丑時也奉全身于方丈後入龕之日道俗數百人哭聲震地如喪父母師生於神廟改元十月初七日巳時閱世六十三歲坐三十四夏度徒百餘衆得法弟子十有三人起名受戒者以萬計門人集其平生得語錄三十卷廣錄五十

卷并弘戒法儀諸書行于世鳴呼臨濟七百年來正如  
陰風晦日而忽有吾師挺出建大寶幢炤耀一世開鑿  
人天眼目以振聾起聵煅煉學者使滄沱支本向鄧尉  
峰頭重懸日月而野干狐狗不得亂鳴墨僊所謂震古  
一人無疑矣祖庭棟宇倏焉摧折佛法平沉此其時也  
嗚呼痛哉嘗憶吾師有云七百年來起臨濟搥胸換手  
哭蒼天至今誦之益令人潸然淚下也嗚呼吾師荷擔  
祖道真不惜一片身心雖蹈湯火無所悔比來兒孫繼  
出法道琳琅無不從吾師大冶中爲工爲匠或曰悟道

古人所難今師之門墻稱悟者比比皆是無太輕乎師  
曰不然諸子旣舍父母割親愛從我遊于寂寞之濱爲  
求出生死耳必欲盡其機用使彼深淺得入以盡吾心  
吾豈效木羅漢不能說法專以避謗毀貪禮敬乎是以  
一生孜孜務以接盡英傑以報佛恩今竟舍我而去矣  
忍嘗憶初入山時纔禮拜師便詬罵不已旣退頗有疑  
望後閱黃龍見慈明語趣還謝過始有今日嗚呼德音  
已遠法乳難酬謹錄師之梗槩以昭來世然掛一漏萬  
正如見日于盆盎之內而真日隱矣嗚呼

崇禎八年七月廿八日嗣法門人弘忍稽首百拜謹狀

附遺

師雖秉拈花之旨猶以弘戒選擇人根嘗于北禪寺註梵綱而殿中佛像放光後說戒畢

率衆禮開元石佛佛亦放光城中士民皆得瞻覩也